


格言別錄



弘一大師選集



格言別錄

南無阿彌陀佛

沙門一音



格言別錄

唐貞元許大方安師華嚴經普賢行願品偈



十方所有諸眾生

願離憂患常安樂



獲淨甚深正法利

咸令煩惱盡無餘



歲次壬申五月廣天法淨院沙門一音書時年三十三




相德師大一弘

格言別錄



一九四二年攝於泉州

格言別錄



徐悲鴻
作

格言別錄

弘一律師造像

壬午夏江逸子敬製



格言別錄



一九三八年攝於彭州梅園



一九四〇年攝於泉州



後排：江山毛世根(右)龍游吳南章(中)
姑蘇尤墨君(左)



一九三八年攝於漳州梅園

格言別錄



一九三六年夏攝於廈門日光巖



弘一大師西畫作品「花卉」



抗戰初期在承天寺所持有的普江縣佛教徒身份證



弘一大師生前使用的文房四寶

格言別錄



一九四二年弘一大師湮槃瑞相



弘一大師生前用物及住房陳設之展示

格言別錄

觀天地生物氣象
學聖賢克己工夫
君子落得為君子
小人枉費做小人

念
智



威
德



格言別錄



不為自己求
安樂但願眾生
得離苦



格言別錄

念佛
不忘
救國
救國
必須
念佛

佛者覺也。覺了真理，乃能誓捨身命，犧牲一切，勇猛精進，救護國家。是故救國必須念佛。辛巳歲寒，大開元寺住七念佛，敬書主奉院僧老人。



專求己過，不責人。

人非步趨先聖先賢

不隨時流上下

戊寅二月

形靈峯滿益大師法語以奉
不樵居士 玄誓 沙門一音



格言別錄

勇 恆 精 進

石燕居士書卷
晚晴老人

我名演音。仰乞

十方一切如來。已入大地

諸菩薩眾。我今欲捨

十方世界佛菩薩所。誓受一切

菩薩學一。誓受一切菩薩淨戒。

謂律儀戒。攝善法戒。饒益有情戒。

如是學處。如是淨戒。過去一切

菩薩已具。未來一切菩薩當具。

普於十方現在一切菩薩今具。

於是學處。於是淨戒。過去一切

菩薩已學。未來一切菩薩當學。

普於十方現在一切菩薩今學。

辛未七月十三日自誓受菩薩戒
敬錄羯磨文以備受時讀白

格言別錄

慧 一 苦
除 切 惡 道



大方廣佛
華嚴經
賢行願品

南無阿彌陀佛



孝順居士供奉 一音



無量壽佛

沙門一音書



格言別錄

清 高 勤 苦

甲戌正月晉江梵行
清信女福智第一期
始業書此以勸勉之
沙門演言

持戒為本 淨土
為歸 觀心為要
善友為依

龍臂



格言別錄

 學道之人骨宜剛

氣宜柔志宜大心宜

虛言宜實

文博居士玄贊
沙門一音



格言別錄

以戒為師



一音
香

老實念佛



沙門玄會



佛祖聖賢未有不
以逆境為大壇鞮者。苟稍
存喜順。惡逆之情。終與夏
草同腐而已。安能如松
柏之亭亭。霜雪間哉。必
受惡罵如飲甘露。過橫
逆如獲至寶。方名素患
難行乎患難。方名於穢
土植淨土因。方名蓮出淤
泥。起登不退。

以雲峯高益大師警訓
辛巳秋月沙門一音



弘一大師
選集

格言別錄

弘一大師
選集
格言別錄

目錄

格言別錄——依《格言聯璧》錄寫	1	處世類	10
學問類	1	接物類	12
存養類	2	齊家、從政、惠吉類	20
持躬類	5	悖凶類	21
敦品類	10		
永覺和尚廣錄摘要	23		
晚晴集	29		



格言別錄

—依《格言聯璧》錄寫—

晚晴老人輯錄

【學問類】

凜閒居，以體獨。卜動念，以知幾。謹威儀，以定命。敦大倫，以凝道。備百行，以考德。遷善改過，以作聖。

—劉忠介公人譜六條

觀天地生物氣象，學聖賢克己工夫。

為善最樂。讀書便佳。

茅鹿門云：「人生在世多行救濟事，則彼之感我，中懷傾倒，浸入肝脾，何幸而得人心如此哉？」



諸君到此何為？豈徒學問文章，擅一藝微長，便算讀書種子？在我所求亦恕，不過子臣弟友，盡五倫本分，共成名教中人！

—廣州香山書院楹聯—

何謂至行？曰：「庸行」。何謂大人？曰：「小心」。

【存養類】

宜靜默。宜從容。宜謹嚴。宜儉約。

謙退是保身第一法。安詳是處事第一法。涵容是待人第一法。恬淡是養心第一法。

劉念臺云：「涵養，全得一緩字，凡言語動作皆是。」
應事接物，常覺得心中有從容閒暇時，纔見涵養。

劉念臺云：「易喜易怒輕言輕動，只是一種浮氣用事，此病根最不小。」

呂新吾云：「心平氣和四字，非有涵養者不能做，工夫只在箇定火。」

陳榕門云：「定火工夫，不外以理制欲，理勝則氣自平矣。」以和氣迎人，則乖泯滅。以正氣接物，則妖氣消。以浩氣臨事，則疑畏釋。以靜氣養身，則夢寐恬。

輕當矯之以重，浮當矯之以實，褊當矯之以寬，躁急當矯之以和緩，剛暴當矯之以溫柔，淺露當矯之以沈潛，谿刻當矯之以渾厚。

尹和靖云：「莫大之禍，皆起於須臾之不能忍，不可不謹。」
逆境順境看襟度。臨喜臨怒看涵養。



自家有好處，要掩藏幾分，這是涵育以養深。別人不好處，要掩藏幾分，這是渾厚以養大。

以虛養心。以德養身。以仁養天下萬物。以道養天下萬世。一動於欲，欲迷則昏。一任乎氣，氣偏則戾。

劉直齋云：「存心養性，須要耐煩、耐苦、耐驚、耐怕，方得純熟。」

寡欲故靜，有主則虛。

不為外物所動之謂靜。不為外物所實之謂虛。

敬守此心則心定。斂抑其氣則氣平。

青天白日的節義，自暗室屋漏中培來。旋乾轉坤的經綸，自臨深履薄處得力。

氣忌盛。心忌滿。才忌露。

意粗性躁，一事無成；心平氣和，千祥駢集。

衝繁地，頑鈍人，拂逆時，紛雜事，此中最好養火。若決烈憤激，不但無益。而事卒以償；人卒以怨；我卒以無成；是謂至愚。耐得過時，便有無限受用處。

人性褊急則氣盛；氣盛則心粗；心粗則神昏；乖舛謬戾，可勝言哉。

自處超然，處人藹然。無事澄然，有事斬然。得意淡然，失意泰然。

【持躬類】

聰明睿知，守之以愚。道德隆重，守之以謙。

富貴，怨之府也。才能，身之災也。聲名，謗之媒也。歡



樂，悲之漸也。

只是常有懼心，退一步做，見益而思損，持滿而思溢，則免於禍。

人生最不幸處，是偶一失言而禍不及；偶一失謀而事倖成；偶一恣行而獲小利；後乃視為故常，而恬不為意。則莫大之患，由此生矣。

學一分退讓，討一分便宜。增一分享用，減一分福澤。不自重者，取辱，不自畏者，招禍。

蓋世功勞，當不得一箇矜字。彌天罪惡，當不得一箇悔字。事當快意處，須轉。言到快意時，須住。

殃咎之來，未有不始於快心者。故君子得意而憂，逢喜而

懼。

物忌全勝。事忌全美。人忌全盛。

安莫安於知足。危莫危於多言。

行己恭。責躬厚。接眾和。立心正。進道勇。擇友以求益，改過以全身。

心不妄念，身不妄動，口不妄言，君子所以存誠。內不欺己，外不欺人，上不欺天，君子所以慎獨。

心術，以光明篤實為第一。容貌，以正大老成為第一。言語，以簡重真切為第一。

以情恕人。以理律己。

以恕己之心恕人，則全交。以責人之心責己，則寡過。

唐荆川云：「須要刻刻檢點自家病痛，蓋所惡於人許多病痛處，若真知反己，則色色有之也。」



緩字可以免悔。退字可以免禍。

大著肚皮容物。立定腳跟做人。

儘前行者，地步窄。向後看者，眼界寬。

花繁柳密處撥得開，方見手段。風狂雨驟時立得定，纔是腳跟。

人當變故之來只宜靜守，不宜躁動，即使萬無解救，而志正守確；雖事不可為，而心終可白；否則必至身敗而名亦不保，非所以處變之道。

步步占先者，必有人以擠之。事事爭勝者，必有人以挫之。

度量如海涵春育。持身如玉潔冰清。襟抱如光風霽月。氣概如喬嶽泰山。

心志要苦。意趣要樂。氣度要宏。言動要謹。

書有未曾經我讀。事無不可對人言。

平生無一事可瞞人，此是大快樂。

心思要縝密，不可瑣屑。操守要嚴明，不可激烈。

聰明者，戒太察。剛強者，戒太暴。

以淡字交友，以聾字止謗。以刻字責己，以弱字禦侮。

居安、慮危。處治、思亂。

事事難上難，舉足常虞失墜。件件想一想，渾身都是過差。

怒宜實力消融。過要細心檢點。

事不可做盡。言不可道盡。

胡文定公云：「人家最不要事事足意，常有些不足處，方

好；纔事事足意，便有不好事出來，歷試歷驗。」

邵康節詩云：「好花看到半開時。最為親切有味。」



精細者，無苛察之心。光明者，無淺露之病。識不足則多慮。威不足則多怒。信不足則多言。足恭偽態，禮之賊也。苛察歧疑，智之賊也。

【敦品類】

敦詩書、尚氣節、慎取與、謹威儀，此惜名也。競標榜、邀權貴、務矯激、習模稜，此市名也。惜名者，靜而休。市名者，躁而拙。

辱身喪名，莫不由此！求名適所以壞名，名豈可市哉？

【處世類】

處難處之事愈宜寬。處難處之人愈宜厚。處至急之事愈宜

緩。

必有容德乃大。必有忍事乃濟。

呂新吾云：「做天下好事，既度德量力，又須審勢擇人。

『專欲難成，眾怒難犯』，此八字，不獨妄動邪為者宜慎；雖以至公無私之心，行正大光明之事，亦須調劑人情，發明事理，俾大家信從；然後動有成，事可久。蓋羣情多闡於遠識，小人不便於私己，羣起而壞之，雖有良法，胡成胡久。」

強不知以為知，此乃大愚。本無事而生事，是謂薄福。

白香山詩云：「我有一言君記取，世間自取苦人多。」
無事時，戒一偷字。有事時，戒一亂字。

劉念臺云：「學者遇事不能應，總是此心受病處。只有鍊心法，更無鍊事法。鍊心之法，大要只是胸中無一事而已。無



一事，乃能事事，此是主靜工夫得力處。」

處事大忌急躁，急躁則先自處不暇，何暇治事？

論人當節取其長，曲諒其短。做事必先審其害，後計其利。
無心者公，無我者明。

【接物類】

持己，當從無過中求有過，非獨進德，亦且免患。待人，當於有過中求無過，非但存厚，亦且解怨。

何以息謗？曰：「無辯。」何以止怨？曰：「不爭。」

人之謗我也，與其能辯，不如能容。人之侮我也，與其能防，不如能化。

張夢復云：「受得小氣，則不至於受大氣。喫得小虧，則

不至於喫大虧。」

又云：「凡事最不可想佔便宜。便宜者，天下人之所共爭也。我一人據之，則怨萃於我矣；我失便宜，則眾怨消矣；故終身失便宜，乃終身得便宜也。此余數十年閱歷有得之言，其遵守之！毋忽！余生平未嘗多受小人之侮，只有一善策，能轉彎早耳。」

忍與讓，足以消無窮之災悔。

古人有言：「終身讓路，不失尺寸。」

任難任之事，要有力而無氣。處難處之人，要有知而無言。

窮寇不可追也。遁辭不可攻也。

恩怕先益後損。威怕先鬆後緊。

先益後損，則恩反為讎，前功盡棄。先鬆後緊，則管束不



下，反招怨怒。

善用威者不輕怒。善用恩者不妄施。

輕信輕發，聽言之大戒也。愈激愈厲，責善之大戒也。

呂新吾云：「愧之，則小人可使為君子。激之，則君子可使為小人。」

激之而不怒者，非有大量，必有深機。

處事須留餘地。責善切戒盡言。

曲木惡繩，頑石惡攻，責善之言，不可不慎也。

呂新吾云：「責善要看其人何如？又當盡長善救失之道，無指摘其所忌、無盡數其所失、無對人、無峭直、無長言、無累言，犯此六戒，雖忠告，非善道矣。」

又云：「論人須帶三分渾厚，非直遠禍，亦以留人掩蓋之

路，觸人悔悟之機，養人體面之餘，猶天地含蓄之氣也。」
使人敢怒而不敢言者，便是損陰鷺處。

凡勸人不可遽指其過，必須先美其長；蓋人喜則言易入；怒則言難入也。善化人者，心誠色溫，氣和詞婉，容其所不及，而諒其所不能；恕其所不知，而體其所不欲；隨事講說，隨時開導；彼樂接引之誠，而喜於所好；感督責之寬，而愧其不材；人非木石，未有不長進者。我若嫉惡如讎，彼亦趨死如驚，雖欲自新而不可得。哀哉！

先哲云：「覺人之詐，不形於言；受人之侮，不動於色；此中有無窮意味，亦有無限受用。」

論人之非，當原其心，不可徒泥其迹。取人之善，當據其迹，不必深究其心。



呂新吾云：「論人情，只向薄處求；說人心，只從惡邊想；此是私而刻底念頭，非長厚之道也。」

修己以清心為要。涉世以慎言為先。

惡莫大於縱己之欲。禍莫大於言人之非。施之君子，則喪吾德。施之小人，則殺吾身。（案：此指言人之非者。）

人褊急，我受之以寬宏。人險仄，我待之以坦蕩。

律己宜帶秋氣。處世須帶春風。

盛喜中勿許人物。盛怒中勿答人書。

喜時之言，多失信。怒時之言，多失體。

靜坐常思己過。閒談莫論人非。

面諛之詞，有識者，未必悅心。背後之議，受憾者，常若

刻骨。

臨事須替別人想。論人先將自己想。

惠不在大，在乎當厄。怨不在多，在乎傷心。

毋以小嫌疏至戚。毋以新怨忘舊恩。

劉直齋云：「好合不如好散，此言極有理。蓋合者始也，散者終也，至於好散，則善其終矣。凡處一事，交一人，無不皆然。」

嚴著此心以拒外誘，須如一團烈火，遇物即燒。寬著此心以待同群，須如一片春陽，無人不暖。

凡一事而關人終身，縱確見實聞，不可著口。凡一語而傷我長厚，雖閒談戲謔，慎勿形言。結怨讎，招禍害，傷陰鷺，皆由於此。

遇事只一味鎮定從容，雖紛若亂絲，終當就緒。待人無半



毫矯偽欺詐，縱狡如山鬼，亦自獻誠。

公，生明。誠，生明。從容，生明。

公生明者，不蔽於私也。誠生明者，不雜以偽也。從容生明者，不淆於惑也。

窮天下之辯者，不在辯在訥。伏天下之勇者，不在勇而在怯。

以仁義存心，以忍讓接物。

林退齋臨終，子孫環跪請訓。曰：「無他言！爾等只要學喫虧。」

寬厚者，毋使人有所恃。精明者，不使人無所容。

喜聞人過，不若喜聞己過。樂道己善，何如樂道人善。

持身不可太皎潔，一切污辱垢穢要茹納得。處世不可太分

明，一切賢愚好醜要包容得。

精明須藏在渾厚裏作用，古人得禍，精明人十居其九，未有渾厚而得禍者。

德盛者其心和平，見人皆可取，故口中所許可者多。德薄者，其心刻傲，見人皆可憎，故目中所鄙棄者眾。

呂新吾云：「世人喜言無好人，此孟浪語也。推原其病，皆從不忠不恕所致，自家便是箇不好人，更何暇責備他人乎。」
攻人之惡毋太嚴，要思其堪受。教人以善毋過高，當使其可從。

事有急之不自白者，緩之或自明，毋急躁以速其戾。人有操之不從者，縱之或自化，毋苛刻以益其頑。

己性不可任，當用逆法制之，其道在一「忍」字。人性不



可拂，當用順法調之，其道在一「恕」字。

欲論人者，先自論。欲知人者，先自知。

凡為外所勝者，皆內不足。凡為邪所奪者，皆正不足。

今人見人敬慢，輒生喜愠心，皆外重者也。此迷不破，胸中冰炭一生。

小人樂聞君子之過。君子恥聞小人之惡。此存心厚薄之分，故人品因之而別。

【齊家、從政、惠吉類】

群居，守口。獨坐，防心。

造物所忌，曰刻、曰巧。萬類相感，以誠、以忠。

「謙」卦、六爻皆吉。「恕」字，終身可行。

知足常足，終身不辱。知止常止，終身不恥。

明鏡止水以澄心。泰山喬嶽以立身。青天白日以應事。霽月光風以待人。

錢志騶君子懷刑題文開講云：「自恕之人，皆曰蹈於刑，而不知憂。曰幸免於刑而不知愧。又收束二小比云：「人方有欲自肆，幾疑朝夕補救之迂，而孰知惟此制心之可保。人至無地自容，始悟名教從容之樂，而豈若先乎慮患之為安？」學問有得之語，當從戰兢惕勵中來，真有功世道之文也！（案：「收束二小比云，」，原格言聯璧無「云」字，為弘公選錄時所加。）

【悖凶類】

盛者，衰之始。福者，禍之基。



談玄說妙修證次第，自以佛書最爲詳盡，而我等初學之人，持躬敦品、處世接物等法，雖佛書中亦有說者，但儒書所說，尤爲明白詳盡，適於初學，故今多引之，以爲吾等學佛法者之一助焉。（摘自晚晴老人改過實驗談講稿）

永覺和尚廣錄摘要

喪己而為人，吾寧避人而守己，非以守己為賢也；守己猶可以為人，喪己必巧於誤眾！是肆其惡也。輕用而多取，吾寧寡取而儉用，非以儉用為賢也。儉用猶可以養廉，輕用必曲於干眾！是長其貪也。

貢高我慢者，總由我執情深故橫起斯病，為大道之重障。今日學者，專尚此習，謂之硬淨；謂之孤峻；及至遇著一點利害，則柔如繞指，全無主宰。此孔子所謂色厲內荏，乃穿窬之小人也。不知古人全不如此！昔遠錄公謂演首座曰：「但得妙悟自然心靜氣和，容敬色莊。」五祖演曰：「長於包荒，厚於



隱惡，謙以交友，勤以濟眾。」大慧戒首座書：「尤諄諄以謙虛遜讓為勸，諸人既稱禪衲，下視流俗，豈可不思並古人哉？」

禪衲威儀，非是外修邊幅；蓋為內檢其心，必先外束其身；未有身既放逸，而心能靜一者也。所以佛制比丘，威儀必肅；百丈禮法，諸宗共守。宋伊川先生見僧出堂。嘆曰：「三代禮樂，盡在此矣！」由此觀之，當日之威儀為何如也？今有等妄人，任情縱恣，決裂禮法，反笑守律儀者為局曲。果何心哉？昔大覺璉，動靜尊嚴，圓通訥一見直以大器期之；黃龍南，進止有度，居常正襟危坐；二老豈局曲之士哉？是知輕浮躁動必非大器；雖得悟入，終虧全德，唯願學人毋以小器自安可也！

律學自靈芝照元之後，鮮見其人。至於後代稱律師者，名

尚不識，況其義乎？義尚弗達，況躬踐之乎？至於潭柘、昭慶二戒壇，其流弊有不忍言者！若不奉明旨禁之，後來不知成何景象也。萬曆末年，諸方得自說戒，正與佛意合，然鹵莽甚矣！今日欲起律宗之廢者，非再來人，必不能也。悲夫！

末代弘法魔事必多。貪進者，必取辱；過侈者，必招非；知此，即為攝魔軍之第一策。如萬曆間達觀、憨山二老，皆名震一時，以不達此意，卒至罹禍，豈可曰無妄之災，而盡委之命乎？唯雲棲老人，謹、密、儉、約，一步弗苟，故雖享大名，而善始善終，絕無魔事，真末法之良規也。

古人應世之法，必靜以守之，漸以需之，力以行之，使我之力量常有餘，則不困、不窮，事乃克濟。若好大喜功，急於有為，則力小而任重，鮮不仆矣；勢必廣求苦索以應之。至於



廣求苦索，又何暇顧其他哉？勢必遣任雜還；因果弗論；委曲攀緣；廉恥盡喪。毋論其求之弗得，即求之而得，已不勝其顏之厚矣，豈佛祖之道則然哉？

余行年七十有一閱世久矣！古來未有之事，而今有之；生平未信之事，而今信之；深知貪、瞋、癡三毒，其變無涯，其禍亦無涯；雖至於伏尸萬里，流血成川，其心猶未已也。其始，則一念之差而已！吾人可不思防微杜漸，痛懲而力反之哉？不然，熒熒弗熄，卒燎原野，涓涓莫遏，終變桑田；雖欲救之，而噬臍無及矣！

【與朱葵心茂才】

（上略）壺山之事終不敢染指者，非矯節以自高也。特以

某非住庵之僧耳？某削髮入山，祇為生死二字；至於田舍眷屬早已唾涕棄之；豈於此而收其已棄耶？此不可住庵一也。素性疏懶，不閑世務；迂拙任情，難投時好；此不可住庵二也。某受先師戒約，不營世緣；不干豪貴；瓶鉢隨緣，分文不蓄；一旦住庵，則油鹽柴米，將安所取乎？此不可住庵三也。又聞建城諸僧，見士大夫之禮，反在庶民之下，此法滅之兆也，可勝痛哭哉！故某自來，未嘗輕投一刺；即有枉顧，並不報謁；或承寵召，托故避之；豈曰倨侮？以為僧之禮宜如是也！此不可住庵四也。茲袁公喬梓，辱承翰教，雅愛殊深；謙光可挹，令人心愧！然奈某之不可住庵何故哉？（下略）

為僧首要老實，接物必重慈悲。

發言休可傷人；臨事尤宜觀理。



恭以與人，何往非利？傲而恃氣，觸途難安！

大言必自招尤，小心終是寡過。

輕毀戒律，必是無賴禪和；好說世榮，豈為高尚大德？

恕字終身可行，孔言非謬；謙卦六爻皆吉，易教毋忘。

莫妒他長，妒長，則已終是短。莫護己短，護短，則已終不長。

智者達觀三世，念念知非；愚人祇重目前，憧憧造惡。

試思鐵城之苦，宜省藥石之言。

甲申之夏，泉州蒨林禪苑，為曝晒經籍，偶見永覺廣錄殘本四冊，中有夾以紙箋者，蓋晚晴老人之手澤也，凡所夾之處，均為藥石之言，因特錄出而刊印流通之。

晚晴集

釋弘一

弘一律師，自號晚晴老人，蓋取李義山詩：「天意憐幽草，人間愛晚晴」句。律師於辛巳年掩關本寺，集佛經祖語警句二卷，以晚晴名焉。

福州怡山西禪寺沙門傳貫謹識

◎若失本心，即當懺悔；懺悔之法，是為清涼。（金剛三昧經）

◎菩薩若能隨順眾生，則為隨順供養諸佛。若於眾生尊重承事，則為尊重承事如來。若令眾生生歡喜者，則令一切如來歡喜。

（華嚴經普賢行願品）

◎我若多瞋及怨結者，十方現在諸佛世尊皆應見我，當作是



念：「云何此人欲求菩提，而生瞋恚及以怨結？此愚癡人，以瞋恨故，於自諸苦不能解脫，何由能救一切眾生？」

（華嚴經修慈分）

◎迦葉白佛：「我等從今，當於一切眾生，生世尊想；若生輕心，則為自傷」。佛言：「善哉快論」。

案：原寶王論引首楞嚴三昧經時，即有節文，弘公乃依此節文抄錄。

（首楞嚴三昧經依寶王論節文）

◎應代一切眾生受加毀辱，惡事向自己，好事與他人。（梵網經）

◎離貪嫉者，能淨心中貪欲雲翳，猶如夜月，眾星圍繞。

（理趣六波羅蜜多經）

◎生死不斷絕，貪欲嗜味故。養怨入丘塚，虛受諸辛苦。

（大寶積經富樓那會）

◎是身如掣電，類乾闥婆城。云何於他人，數生於喜怒？

(諸法集要經)

◎瞋恚之害，則破諸善法，壞好名聞，今世後世，人不喜見。

(佛遺教經)

◎行少欲者，心則坦然無所憂畏，觸事有餘，常無不足。

(佛遺教經)

◎身、語、意業不造惡，不惱世間諸有情。正念觀知欲境空，無益之苦當遠離。

(有部律—周利槃陀伽尊者，三月不能誦得，即此伽陀也)

◎名譽及利養，愚人所愛樂，能損害善法，如劍斬人頭。

(有部律)

◎世間色聲香味觸，常能誑惑一切凡夫，令生愛著。(智者大師)

◎瞋，是失佛法之根本，墜惡道之因緣，法樂之冤家，善心之



大賊，種種惡口之府藏。

（智者大師）

◎凡夫學道法，唯可心自知；造次向他道，他即反生誹。諦觀少言說，人重德能成，遠眾近靜處，端坐正思惟。但自觀自行，口勿說他短，結舌少論量，默然心柔軟。無知若聾盲，內智懷實寶，頭陀樂閑靜，對修離懈惰。

（道宣律師）

◎處眾處獨，宜韜宜晦，若啞若聾，如癡如醉，埋光埋名，養智養慧，隨動隨靜，忘內忘外。

（翠巖禪師）

◎我且問你：「忽然臨命終時，你將何抵敵生死？」須是閒時辦得下，忙時得用，多少省力。休待臨渴掘井，做手腳不迭。前路茫茫，胡鑽亂撞。苦哉！苦哉！

（黃檗禪師）

◎鼻有墨點，將鏡惡墨，但揩於鏡，其可得耶？好惡是非，對之前境，不了自心，但尤於境，其可得耶？洗分別之鼻墨，

則一鏡圓淨矣！萬境咸真矣！執石成寶矣！眾生即佛矣。

（飛錫法師）

◎修行人大忌說人長短是非，乃至一切世事非干己者，口不可說，心不可思。但口說心思，便是昧了自己。若專鍊心，尚搜己過，那得工夫管他家屋裡事？粉骨碎身，唯心莫動。收拾自心，如一尊木雕聖像，坐在堂中，終日無人亦如此！旛蓋簇擁香花供養亦如此！讚歎亦如此！毀謗亦如此！修行人常常心上無事，時時刻刻體究自己本命元辰端的處。

（盤山禪師）

◎元無我人，為誰貪瞋？

（圭峰法師）

◎報緣虛幻，不可強為。浮世幾何，隨家豐儉。苦樂逆順，道在其中。動靜寒溫，自愧自悔。

（佛眼禪師）



◎學道人逐日但將檢點他人的工夫，常自檢點，道業無有不辦。或喜或怒、或靜或鬧，皆是檢點時節。
(大慧禪師)

◎化人間幻士，谷響答泉聲；欲達吾宗旨，泥牛水上行。

(永明禪師)

◎千峰頂上一茅屋，老僧半間雲半間，昨夜雲隨風雨去，到頭不似老僧閑。
(歸宗芝菴禪師)

◎過去事已過去了，未來不必預思量，只今便道即今句，梅子熟時梔子香。
(石屋禪師)

◎即今休去便休去，若覓了時無了時。
(雲峰禪師)

◎瑣瑣含生，營營來去者，等彼器中蚊蚋，紛紛狂鬧耳！一化而生，再化而死，化海漂蕩，竟何所之？夢中復夢，長夜冥冥，執虛為實，曾無覺日！不有出世之大覺大聖，其孰與而

覺之歟？

（仁潮禪師）

◎縱宿業深厚，不能頓斷；當方便制抑，自勸自心。（妙叶禪師）

◎放開懷抱，看破世間，宛如一場戲劇，何有真實？（蓮池大師）

◎達宿緣之自致，了萬境之如空，而成敗利鈍，興味蕭然矣！

（蓮池大師）

◎伊庵權禪師用功甚銳，至晚，必流涕曰：「今日又只恁麼空過！未知來日工夫如何？」師在眾，不與人交一言。

（蓮池大師）

◎畏寒時欲夏，苦熱復思冬，妄想能消滅，安身處處同。草食勝空腹，茅堂過露居，人生解知足，煩惱一時除。（蓮池大師）

◎人之過惡深重者，亦有效驗。或心神昏塞轉頭即忘；或無事而常煩惱；或見君子而赧然消沮；或聞正論而不樂；或施惠

而人反怨；或夜夢顛倒；甚則妄言失志，皆作孽之相也。苟一類此，即須奮發舍舊圖新，幸勿自誤！
（袁了凡）

◎只「強順人情，勉就世故。」八箇字，誤卻你一生大事。道業未成，無常至速！急宜斂跡韜光，一心向道，不得再誤！

（西方確指）

◎深潛不露，是名持戒；若浮於外，未久必敗。有口若啞，有耳若聾，絕群離俗，其道乃崇。
（西方確指）

◎種種惡逆境界，盡情看作真實受益之處。名利、聲色、飲食、衣服、讚譽、供養，種種順情境界，盡情看作毒藥毒箭。
（蕩益大師）

◎將身心世界全體放下，作一超方特達之觀。
（蕩益大師）

◎善友罕逢，惡緣偏盛，非咬釘嚼鐵，刻骨鏤心，何以自拔

哉？

（蕩益大師）

◎何不趁早放下幻夢塵勞，勤修戒定智慧？

（蕩益大師）

◎勿貪世間文字詩詞，而礙正法！勿逐慳、貪、嫉妒、我慢，鄙覆習氣，而自毀傷！

（蕩益大師）

◎內不見有我，則我無能；外不見有人，則人無過；一味癡呆，深自慚愧！劣智慢心，痛自改革！

（蕩益大師）

◎籬菊數莖隨上下，無心整理任他黃，後先不與時花競，自吐霜中一段香。

（誦帚禪師）

◎從今以後，願遯世不見知而不悔。作一齋公齋婆，向廚房灶下安隱過日，今生不敢復作度人妄想。

（彭二林）

◎幸賴善緣，得聞法要，此千生萬劫轉凡成聖之時。尚復徘徊歧路，乍前乍卻，則更歷千生萬劫，亦如是而止耳！況輾轉



淪陷，更有不可知者哉？

（彭二林）

◎輪轉生死中，無須臾少息，猶復熙熙如登春臺？曾不知佛與菩薩，為之痛心而慘目也。

（彭二林）

◎汝信心頗深，但好張羅及好遊、好結交，實為修行一大障。祈沈潛杜默，則其益無量。戒之！

（印光大師）

◎汝是何等根機，而欲法法咸通耶？其急切紛擾，久則或致失心！

（印光大師）

◎當主敬、存誠，於二六時中，不使有一念虛浮怠忽之相。及與世人酬酢，唯以忠恕為懷。則一切時、一切處，惡念自無從而起。

（印光大師）

◎直須將一個「死」字

原註云：「此字好得很。」

挂到額顱上。

（印光大師）

◎若善男子、善女人，聞說淨土法門，心生悲喜，身毛為豎如

拔出者，當知此人，此過去宿命已作佛道來也。

（無量清淨平等覺經依迦才淨土論引文）

◎汝今亦可自厭生死老病痛苦，惡露不浮，無可樂者！

（無量壽經）

◎無憂惱處，我當往生，不樂閻浮提濁惡世也。（觀無量壽佛經）

◎纔有病患，莫論輕重；便念無常，一心待死。（善導大師）

◎我未曾見聞，慈悲而行惱；互共相瞋恚，願生阿彌陀。若人如恒沙，惡口如刀杖，如是皆能忍，則生清淨土。

（諸法無行經）

◎生宏律範，死歸安養，平生所得，唯二法門。（靈芝元照律師）

◎凡聞惡聲，則念阿彌陀佛以消穢之，願一切人不為惡行；凡見善事，則念阿彌陀佛以贊助之，願一切人皆為善行；無事



則默念阿彌陀佛，常在目前，便念念不忘；能如此者，其於淨土決定往生。

（王龍舒）

◎人生能有幾時？電光眨眼便過！趁未老、未病，抖身心，撥世事；得一日光景，念一日佛名；得一時工夫，修一時淨業；由他命終，我之盤纏預辦，前程穩當了也。若不如此，後悔難追！

（天如禪師）

◎如就刑戮，若在狴牢；怨賊所追，水火所逼；一心求救，願脫苦輪。

（天如禪師）

◎於此土聲色諸境，作地獄想、苦海想、火宅想。諸寶物，作苦具想。飲食、衣服，如膿血鐵皮想。

（妙叶禪師）

◎此界釋迦已滅，彌勒未生，賢聖隱伏。眾生奔波苦海，猶失父之兒；若不以極樂願王為歸，誰為救護？

（妙叶禪師）

◎惟名聞利養，甜愛軟賊，及瞋心瞋火，雖有佛力，不能救焉！行者當深加精進，以攘卻之！
（妙叶禪師）

◎又復當護人心，勿使誇嫌，動用自若；息世雜善；不貪名利；將過歸己；捐棄伎能；惟求往生。
（妙叶禪師）

◎娑婆有一愛之不輕，則臨終為此愛所牽；矧多愛乎？極樂有一念之不一，則臨終為此念所轉；矧多念乎？
（幽溪法師）

◎若生恩愛時，當念淨土眷屬無有情愛，何當得生淨土？遠離此愛。若生瞋恚時，當念淨土眷屬無有觸惱，何當往生淨土？得離此瞋。若受苦時，當念淨土無有眾苦；但受諸樂。若受樂時，當念淨土之樂無央無待。凡歷緣境，皆以此意而推廣之，則一切時處，無非淨土之助行也。
（幽溪法師）

◎如何說得娑婆苦？苦事紛紛等蝟毛！
（西齋禪師）



◎當屏人獨處，自辦道業，以設像為師，經論為侶。（袁宏道）

◎五濁惡世寒熱苦惱，穢相熏炙，不容一刻居住。（袁宏道）

◎問：「人不信淨土，恐只是本來福薄？」答：「此言甚是！」

（蓮池大師）

◎余下劣凡夫，安分守愚，平生所務，惟是南無阿彌陀佛六字。今老矣！倘有問者，必以此答。

（蓮池大師）

◎當生大歡喜，切勿懷憂惱，萬緣俱放下，但一心念佛。往生極樂國，上品蓮花生，見佛悟無生，還來度一切。（蓮池大師）

◎世情淡一分，佛法自有一分得力。娑婆活計輕一分，生西方便有一分穩當。

（蕩益大師）

◎彈指歸安養，閻浮不可留。

（蕩益大師）

◎歸命大慈父，早出娑婆關。

（蕩益大師）

◎世之最可珍重者，莫過精神；世之最可愛惜者，莫過光陰；一念淨即佛界緣起，一念染即九界生因；凡動一念即十界種子，可不珍重乎？是日已過，命亦隨滅，一寸時光即一寸命光，可不愛惜乎？苟知精神之可珍重，則不浪用，則念念執持佛名。光陰不虛度，則刻刻熏修淨業。

（徹悟禪師）

◎悲哉眾生！欲念未除，道根日壞。佛之視汝，將何以堪？

（彭二林）

◎子等歸向極樂，全須打得一副全鐵心腸，外不為六塵所染，內不為七情所錮，污泥中便有蓮華出現也。

（彭二林）

◎蓮花種子，榮悴由人。時不相待，珍重！珍重！

（彭二林）

◎上品見佛速，下品見佛遲；雖有遲速異，終無退轉時。參禪病著相，念佛貴斷疑，實實有淨土，實實有蓮池。（張守約）



◎念阿彌陀佛，正覺圓滿之名；觀極樂世界，清淨莊嚴之相；如此滯著，只怕未能切實；果能切實，則世間種種幻化、妄緣，自當遠離。

（悟開禪師）

◎隨忙隨閑，不離彌陀名號，順境逆境，不忘往生西方。

（印光法師）

◎誠與恭敬，實為超凡入聖，了生脫死之極妙秘訣。

（印光法師）

◎業障重、貪瞋盛、體弱、心怯、但能一心念佛，久之自可諸疾咸愈。

（印光法師）

◎佛固不見棄於罪人，當承茲行以往生耳。

（印光法師）

◎須信娑婆實實是苦，極樂實實是樂，深信佛言，了無疑惑。

（印光法師）

◎應發切實誓願，願離娑婆苦，願得極樂樂。其願之切，當如

墮廁坑之急求出離，又如繫牢獄之切念家鄉；己力不能自出，必求有大勢力者提拔令出。

（印光法師）

◎業識未消，三昧未成，縱談理性，終成畫餅。

（印光法師）

◎入理深談，且緩數年。

（印光法師）

◎一句南無阿彌陀佛，只要念得熟，成佛尚有餘裕！不學他法，又有何憾？

（印光法師）

◎汝雖於淨土法門，頗生信心；然猶有好高騖勝之念頭，未能放下，而未肯以愚夫愚婦自命！

（印光法師）

◎其有平日自命通宗通教，視淨土若穢物，恐其污己者；臨終多是手忙腳亂，呼爺叫娘。

（印光法師）

◎汝妄想之心遍天遍地，不知息心念佛；所謂：「向外馳求，不知返照回光。」

（印光法師）



◎今見好心出家在家四眾，多是好高鶩遠，不肯認真專修淨業；總由宿世善根淺薄，今生未遇通人。
(印光法師)

◎當今之時，其世道局勢，有如安臥積薪之上，其下已發烈火；尚猶悠忽度日，不專志求救於一句佛號，其知見之淺近甚矣！
(印光法師)

◎心跳惡夢，乃宿世惡業所現之兆；然現境雖有善惡，轉變在乎自己；惡業現而專心念佛，則惡因緣為善因緣。
(印光法師)

◎當恪守淨宗列祖成規，持齋念佛，改惡修善，知因識果，植福培德；以企現生消除業障，臨終正念往生；庶不虛此一生，及親為如來弟子耳。
(印光法師)

◎但當志心念佛，以消舊業；斷不可起煩躁心，怨天尤人。
(印光法師)

◎具縛凡夫，若無貧窮疾病等苦，將日奔馳於聲色名利之場，而莫之能已！誰肯於得意烜赫之時，回首作未來沈溺之想乎？

（印光法師）

◎欲得佛法實益，須向恭敬中求；有一分恭敬，則消一分罪業，增一分福慧。

（印光法師）

◎念佛，要時常作將死、將墮地獄想；則不懇切亦自懇切，不相應亦自相應；以怖苦心念佛，即是出苦第一妙法；亦是隨緣消業第一妙法。

（印光法師）

◎末世眾生，無論有善根、無善根，皆當決定專修淨土；善根有，固宜努力！無，尤當篤培！

（印光法師）

◎汝須自知好歹，修行要各盡其分，潛修默契方可！急急改過，攝心念佛！

（印光法師）



寒笳集

——又名蕩益大師警訓略錄——

晉水瓔珞院沙門善臂集

壬戌之歲，嘗依靈峯宗論撫寫警訓一卷，顏曰《寒笳集》。辛未仲秋，又為覈纂，題曰：《蕩益大師警訓略錄》。今復改集，並存二名。挈錄之意，唯以自惕，故於嘉言多有闕遺，後之賢者幸為增訂焉。於時後二十二年歲次癸酉四月，學南山律於禾山萬壽巖。

【願文】

稽首大慈悲，救護末劫者；我念末劫苦，破戒為第一。

我思救苦方，無越毗尼藏；毗尼若住世，正法永不滅。
行成果斯剋，教不屬空言；或因持戒力，速成淨滿尊。
或因淨尸羅，嚴淨諸佛土；或因別解脫，作獨覺聲聞。
或因善戒力，生禪及天道；亦作人中勝，福樂好名稱。
如是差別果，皆由戒所得；近果說差別，究竟歸一乘。
如是勝妙法，願為我昭明；普度長夜中，無依無怙眾。

（下略）

【法語】

（上略）應以猛切心治姑待心，常念時不待人，一蹉便成百蹉；以殷重心治輕忽心，一言有益於己，便應著眼銘心；以深廣心治將就心，期待誓同先哲，舉措莫類時流；三若缺一，



學道難矣。

流俗知見不可入道，我慢習氣不可求道，未會先會不可語道，宴安怠惰不可學道，顧是惜非不可謀道，自信己意不可問道，捨動求靜不可養道，棄教參禪不可得道，依文解義不可會道，欲速喜近不可悟道，隔小於大不可見道，執穢為淨不可知道，厭常喜新不可趨道，樂簡畏繁不可明道，將就苟且不可修道，得少為足不可證道。惟超羣拔俗，謙己、虛心、忍苦、捍勞，親近知識，觸處體會，以教印心，廣大悠久，事理雙備，棲神淨域，履蹈典型，博通古今，特達勇銳，深心無極誓窮法海源底（以上二行之文，與前段對之，其義相反可知。），乃真實男子、出世丈夫。

夫比丘者，體預僧寶之尊，職紹佛法之種；須超羣拔俗，

迴脫流俗知見，方無愧厥名。儻故轍不改，則一舉一動罪案如山，一旦業風吹去，袈裟下失卻人身，苦中之苦。人間五十年，四王天一晝夜，有何實法可戀？若不急尋出要，寧唯一錯百錯，塵沙劫數未有了期，血性漢子能勿悚然在念乎？

有出格見地，方有千古品格；有千古品格，方有超方學問；有超方學問，方有蓋世文章。今文章學問不從立品格始，品格不從開見地始，是之楚而北其轅也。嗚呼！習俗移人，賢智不免，狃一時耳目，忘曠劫因緣；非以理奪情，以性違習，安能洞開見地，使文章事業一以貫之也哉？

習氣不除，無出生死分；然習氣熏染非一朝一夕之故，不痛加錘拶，何由頓革？須猛念身世無常，幻緣虛假；人道難生，佛乘難遇。失此不求度脫，千生萬劫何期？便將是非、人



我，體面界牆，身見慢幢，愛染情性，全體放下，不復躊躇。將如來出世要法，徹底承當；愛樂受持，精勤趨向，自然福慧增長，日造深微。（下略）

（上略）今時釋子只圖作宗法律師，設無出頭一著；雖頓超佛地者，亦不顧矣。本發心，原非為菩提大道、曠劫遠猷；故一受戒，兢兢鉢杖表相；一聽講，孜孜消文為事；一參禪，念念機鋒是務。至應期禁足閉關等，皆百年活計，人世公案，本分事千萬重矣。彼於微妙佛道，僅從經本上依稀聞解，未嘗親知灼見，終屬半信半疑，於眼前活計，未嘗諦觀三界苦空無常，終覺放他不下。雖學成語陵駕佛祖，實一時高興，或初生牛犢不畏虎，或童豎戲劇自稱天王，未嘗以佛祖自期也。間有發勝志者，不能到底唯為菩提一事，或被名利改節，雖云漸變

初心，仍是因中夾帶，不可不慎思而痛勵也。

（上略）儻名關未破，利鎖未開，藉言弘法利生，止是眼前活計。一點偷心，萬劫纏繞，縱透盡千七百公案，講盡三乘十二分教，興崇梵刹如給孤獨園，廣收徒眾如無相好佛，無明業識不斷，俱為自誑自欺。（下略）

悲智相應，名菩提心，發此心已，方得無作戒。又須二六時常自省察，念念相應，即念念成佛。稍不合，便於菩薩戒得失意罪，在慎思而力行之。有三障，能敗戒德，使信心退沒。

- 一、瞋恚：橫於自他而生惱害。
- 二、我慢：於諸僧寶而生輕忽。
- 三、懈怠：於諸妙法不肯學習。
- 三法有一，牽入惡道，忘失信心。



(上略) 若的確求出生死，證菩提，先將近時禪講流弊盡情識破；自己從來杜撰主義，盡情放捨；軟煖習氣，盡情打掃乾淨；夢幻身命，盡情拌得拋得；種種惡逆境界，盡情看作真實受益之處；名利、聲色、飲食、衣服、讚譽、供養種種順情境界，盡情看作毒藥毒箭。(中略) 又身見重者，宜苦行消之；貪愛強者，宜苦境鍊之。人我山高者，逆緣挫之；體面心重者，忍辱治之。(下略)

討究佛法，第一要務。諸佛所師，所謂法也，況弟子乎？雖勝義法性，貴在親證，儻非黃卷赤牘作標月指，示真實修行出要，何由得證勝義？試觀外道亦出家求出生死，不知正法，求昇反墜。故不留心教典，饒勇猛精進，定成魔外。脅尊八十出家，晝觀三藏，夜習禪思，乃有濟。有謬云：「年少力強宜

習教典，年衰力弱只堪念佛。」豈年少不必念佛？年老不可習教？將謂如來教法，僅同舉子業，博名利於半生者乎？一歷耳根永為道種，大士所以捨全身求半偈也。今佛法流布，賴迦葉、阿難二祖徹底悲心，人皆視作等閒，殊不知恒沙世界無量劫中，妙法名字不可得而聞也。示閱藏四則：一須體如來說法本意，要人超生脫死，非為口耳活計。句句消歸自心。如說修行，方不受說食數寶之誚。一學問之道貴下學上達，所以如來施教必有次第。今人空腹高心，但圖圓頓之名，無力飲河，詎能吞海？必先閱律藏，稔知佛世芳規，深鍊為僧要務。次閱四阿含，了正因緣境，為圓妙三觀之本。次留心台教，深知如來說法所以然之妙，及四悉檀巧被之致。然後將此法界匙鑰遍開不思議經論之鎖，勢如破竹矣。一閱律首四分，次僧祇，次十



誦，次根本，次五分，次及善見毗尼母等。諸家傳受不同，各有源委線索，須細尋之。無執一非餘，亦無猶豫兩楹，在得意善用。大意如問辯所明（散見於毘尼事義集要全部中）。莫謂此小乘法不足久久留心，當捨之別參上乘；是末世癡人邪慢惡見，牽人墮惡道深坑，不可信也。一大小經律論，雖字字明珠，言言見諦；然各就習氣所重，對治所宜；或隨時弊不同救拯有異，不妨摘出要語，期自利利他。如雪山無非藥，採者期於對病；寶山無非寶，取之先擇摩尼，只此成錄，足驗手眼。

萬法本融，由迷情執而成礙，如一指能蔽山岳，認漚必遺大海；不惟埋沒己靈，亦冤屈六塵境界。詎思六塵非能惑人，人自妄惑。根根幻馳，識識紛動，仔細推求，塵既不居其咎，根亦豈職其愆？識寧獨當其罪？三科分析既無真主，縱令共合

那有實法？而於此虛妄法中，著我著人分取分捨，猶如捏目，亂華發生，更欲分別華相妍醜大小，不益惑乎？惟將身心世界全體放下，作一超方特達之觀。譬如為天下者不顧家，則智眼昭明，一切境界無非真實受用處矣！

夫幻境侵奪，不惟順流俗而俱化也，即厭流俗而切思遠離亦名侵奪。以一切境界全是無明變現，無明變現之性全即法性，由不達故橫生欣厭。趨無上菩提者，不得隨順幻境，亦不得厭離幻境；但了幻境即法性，悲長夜之在迷；以悲迷故起無作二誓欲拔性德之苦，以了性故起無作二誓欲與性德之樂。發此心已，則一切不如法境界觸目驚心，無非助發菩薩資糧。



起信論云：「菩薩見法欲滅護正法故發菩提心，

有見眾生苦而發菩提心。」

正謂此也。

奮發之心人皆有之，不能不藉於外緣；羞惡之心人皆有之，不能不汨於惡習。嗚呼！善友罕逢，惡緣偏盛，非咬釘嚼鐵，刻骨鏤心，何以自拔哉？世法惟恐不濃，出世法惟恐不淡（中略），欲深入淡字法門，須將無始虛妄濃厚習氣盡情放下，放至無可放處，淡性自得現前。淡性既現，三界津津有味境界如嚼蠟矣。僧夢虎、驚寤喜曰：「匪夢幾被虎食。」既悔曰：「知是夢，何不做一人情。」噫！可醒三界之戀幻質？不知淡性者矣！

世事虛幻，人命無常，當擴其眼界，勁其神慮，苦其身毋墮宴安鳩毒坑壑，策其志毋循將就苟且塗轍，汰奢窒欲，積行存誠，惜福延壽以期於大成。爾誠靜坐默思，只此現前一念見聞之性，本非內外方隅，亦非有無情量，云何被此虛妄形質所局？虛妄形質，生必有滅，千般保愛，不能令其不朽。而所作幻業，如影隨形，從劫至劫不肯相離。豪傑之士，先須覷空身形非我，不過假借四大所成；心亦無相，不過因於情塵妄見生滅。便頓捨情塵，專心辦道，兼律兼教助顯心源；但得悟心，萬法何有？萬有俱息，萬法俱備矣！

出世丈夫以佛祖自期，以四弘為券，以六度萬行為家常茶飯，以自利利他為的，發一言不足自利利他，勿言也；舉一步作一念不足自利利他，勿舉也勿念也。事苟益身心裨法化，必



黽勉為之，雖劬勞困苦，勿恤也。否雖有浮名幻利，弗屑也。

（下略）

人能痛念生死事大，覷破一切世情若順若逆，總虛妄不實，過眼便是空花。獨一念持戒禮懺篤信三寶之心，生與同生，死與同死；而又專求已過，不責人非，步趨先聖先賢，不隨時流上下，庶幾信心日固，智慧日開，而生死可永脫耳。

聽法須觀心，書寫須解義；然解義正不必強加穿鑿，亦不徒循章摘句。但至誠讀誦，展卷如對活佛，收卷如在目前。千遍萬遍，淪骨浹髓，寤寐不忘。緣因既深，一十二千七百，無不一串穿卻也。得此消息，便知吾言不誣。

世人談及生死，鮮不悚慮。往往不能真為生死者，眼前活計放不下耳。然所以放不下者，祇不曾徹見生死之苦，以從來

為俗為僧皆向順境中捱過，故畏三界心自然發得不真切。儻以遠大慧眼曠觀無始輪迴，痛念此生果從何來？死後當至何趣？前際茫茫，後際墨墨，饒鐵石心腸必為驚怖。然後依正教、開圓解、起圓行，敢保十人有五雙到家。最懼因地不真，道眼昏暗；或為世味所牽；或為邪師偽法所誤，袈裟下失卻人身，此予所以俯仰時流，而寤寐永歎也。

具參方志，尤須具參方眼，具參方眼，還須不忘參方志。參方志者，不為虛名、圖體面，博一知半見。發無上大菩提心，遍學一切法門無厭無足。參方眼者，末世師匠，邪正難分。今自卓立，不論宗教，但與出生死相應，名利不相應；大菩提相應，眼前活計不相應者，則為正。反此，則為邪。正則依，邪則捨。具眼不忘參方志者，本求無上菩提。雖邪正分



明，不妄生憎愛。善吾師，不善吾資；但隨緣觸境增長道心智眼而已。此本分中最要緊事，其餘叢林粥飯習氣，萬萬不宜沾染，亦不必厭惡也。

超生脫死法門，不可以聰明湊泊，不可以意氣承當，不可以情見夾雜，不可以麤疏領會。先須專求己過，無責人非，見賢思齊，見惡內省，法法消歸自心，時時警策自心。將定盤星認得清楚明白，然後看經可、坐禪可、營福可。如眼目未明，存心未篤；則看經必墮口耳活計；坐禪必墮暗證深坑；營福必成魔家伴侶。縱福慧雙修，教觀並進，而我心未忘，能所日熾，其為修羅眷屬無疑，所宜慎思而密察也。

履三寶地，具出世儀，皆多劫善種，況聞正法乎？寧國一老者，種福五十餘年，求來世作燒火僧不可得；而聽經白鴿轉

身為戒環禪師，聞法功德超勝如此。人生幾何？少壯忽老，老忽烏有，且盛年夭橫者無數。一息才斷，孤魂無侶，生平惡業無不隨身，何不趁早放下幻夢塵勞，勤修戒定智慧。息心達本源，乃號為沙門。不然，堂堂僧相，多劫勤修而得之，一旦藐視而失之，能無憬哉？

（上略）每見人冗中偷閒，吟詩習字，作種種清課；豈不能偷閒玩大乘？息心學定慧耶？彼於詩字得少幻味，未嘗於大乘定慧得真法味也。然縱不得味，亦為無上菩提而作種子；且幼時詩字亦向不得味中來，安知佛法漸熏習不於現身得受用耶？嗟嗟！人之精神用之詩字，吾見右軍李杜不出生死；用之佛法，吾見散亂豔喜愚癡特迦大事已辦。

發心應學二事。一智慧，二慈悲方便。欲學智慧，莫若讀



誦大乘方等經典，深解義趣，隨文入觀。不墮嚼木之譏，不招數寶之誚。又數近明師良友討究抉擇，不可師心自是。欲學慈悲方便，須深信一切眾生皆有佛性，定當作佛。見僧俗造惡者，勿生輕慢，須憐憫愛念，種種善巧而迴護接引之。儻恃己修，見不修行便生忽慢。自持戒，慢破戒者；自讀誦大乘，慢無聞者；自解義，慢愚魯者；自觀心，慢口說者。人我山高，勝負情重，畢生勤苦，止成修羅法界，去菩薩道遠矣！

三界之中，無非牢獄，暫時快樂，終歸無常。眾生燕雀處堂，罕思出離，惟逆境當前，庶幾生遠離之心。故佛稱八苦為八師，非虛語也。（下略）

佛法之衰也。名利熏心，簣鼓為事，求一真操實履者，殆不可得。有能持戒精進讀誦大乘不馳世務，縱道眼未開，亦三

世諸佛所歎許也。況了必藉緣，非持戒讀誦，何處得有道眼？今講家多忽律行，禪門並廢教典，門庭愈高，邪見益甚。（下略）

學不難有才，難有志；不難有志，難有品；不難有品，難有眼。惟具超方眼目，不被時流籠罩者，堪立千古品格。品立則志成，志成才得其所用矣。末世競逐枝葉，罕達本源；誰知朝華易落，松柏難彫。才志之士，奈何甘捨大從小哉？莫大於現前一念，誠能直下觀察，知其無性；則決不妄認四大為自身相，六塵緣影為自心相。身心二妄既消，不真何待。然後以此真解，歷一切法俾盡淨虛融，無塵影垢習可得。還淳復素，道風豎窮橫遍矣，但一念未瞥，使百年活計縈懷，眼下虛名惑志。吾恐天真日漓，負美才好志不淺也。

極聰明人，反被聰明誤，所以不能念佛求生西方。而愚人女子，反肯心厭娑婆苦，深求出離。當知彼是真愚癡，此乃大智慧。好惡易分，莫自昧也。（中略）吾勸汝咬釘嚼鐵，信得西方及，切切發願，持戒修福以資助之。無禪有淨土，萬修萬人去；但得見彌陀，何愁不開悟？此千古定案，汝不須疑。（下略）

佛知佛見無他，眾生現前一念心性而已。現前一念心性，本不在內外中間，非三世所攝，非四句可得。只不肯諦審諦觀，妄認六塵緣影為自心相，便成眾生知見。若仔細觀此眾生知見，仍不在內外中間諸處，不屬三世不墮四句，則眾生知見當體元即佛知佛見矣。儻不能直下信入，亦不必別起疑情，更不必錯下承當；只深心持戒念佛。果持得清淨，念得親切，自

然驀地信去。所謂更以異方便，助顯第一義也。（中略）

偈曰：「眾生知見佛知見，如水結冰冰還泮。

戒力春風佛日暉，黃河坼聲震兩岸。

切莫癡狂向外求，悟徹依然擔板漢。」

剋除習氣，莫若三業行慈，三業行慈，則無十過。十過既除，十善斯在，而五乘之本立矣。然後以實相印之，法法皆歸佛道。古有行之，常不輕菩薩是也。初隨喜品便淨六根，何俟誦說方名深觀，果能以慈修業，自能善入佛慧。不然，學問愈多，我慢愈熾，習氣愈長，去道愈遠。惟益多聞，增長我見，可懼也。

學道不難伶俐，難於慎重；發心不難勇銳，難於堅久；涉



世不難矯俗，難於自持；作事不難敏達，難於深忍；研義不難領解，難於精確。（下略）

世情淡一分，佛法自有一分得力；娑婆計輕一分，生西方便有一分穩當。此事祇問心，不必問知識也。知識亦勸，淡世情、輕活計，專修出要耳。天平一頭低，一頭必昂；雖巧識強捻，不得腰纏十萬貫，騎鶴上揚州；漢武秦皇；不能扭作一句。況下者乎？

世出世事，莫不成於慈忍，敗於忿躁。故君子以慈育德，以忍養情。德育，天地萬物皆歸我春風和氣之中；情養，乖戾妖孽皆消於光天化日之下；然後以之自成，則為淨滿自尊；以之成物，則為慈力悲仰。儻一念瞋起，百萬障生，小不能忍，大謀斯亂，況今刀兵劫濁，不過積恚所招；世局土崩，皆無遠

慮所致；士生斯世，宜何如努力以障狂瀾也！

學道與學好不同。學好祇得世間虛名，學道貴得出世實益；學好只顧眼前局面，學道須明塵劫遠猷。塵劫遠猷不離眼前，而戀卻眼前頓昧塵劫；惟達士直觀眼前一剎那性，非生滅、無去來、了不可得，安有身世自他可拘可戀？然後觀同體積迷，興無緣弘誓，苟不足自利利他者，舉世趨之弗屑為！果能自利利他，世共非之弗敢怨，是謂學道，亦真學好者矣。

學道之人，骨宜剛，氣宜柔；志宜大，膽宜小；心宜虛，言宜實；慧宜增，福宜惜；慮宜遠，思宜近。事上宜虔，接下宜謙，處同輩宜退讓；得意勿恣意奢侈，失意勿抑鬱失措；作福莫如惜福，悔過莫如寡過。應念身世苦空，切莫隨流逐隊；衣取蔽形莫貪齊整，食取克餒莫嗜美味，嘗省此世前生作何功

行，可坐享檀施。十二時恆檢點身口意業，善多耶？惡多耶？無記多耶？堪消四事耶？不堪耶？如此慚愧覺悟修省；自然習氣漸消，智光漸露，祖意佛意，顯於一念清淨心中矣。

（上略）嗟嗟！不與菩提大心相應，云代佛揚化，吾不信也。不與為生死心相應，云大菩提心，尤不信也。勝負情見不忘，僅成阿修羅法界，名利眷屬意念不忘，僅成三塗魔羅種子。隨其所見所聞而起法執，不能捨棄名言習氣，不達如來說法旨趣，不知種種四悉因緣，僅成凡外戲論窠窟。學問益多，害心益甚；學人益盛，正法益衰。吾所以每一念及，未嘗不夢寐痛哭者也。

學道貴有品格，有識量，而文字記問不與焉。有品格無識量，不足曠超千古，猶無品格也。有識量無品格，不足砥柱中

流，猶無識量也。品格識量既具，則不被眼前活計所局，時流習氣所遷，縱鈍若般陀，而拂塵除垢四字義熟，便堪證沙門果，發無礙辯。況本解文義者哉？嗚呼！法門之衰，至今日不忍言矣。剝必復，否必泰，若要梅花香撲鼻，還他徹骨一番寒。豪傑之士，宜何如動心忍性以無負己靈也？

法門之衰，已非一日，而致衰之故，由因地不真。今人發心參學，罔不以扶持法門為志，及察其所謂扶持者，不過曰：「開叢林」建梵剎，攢指五千一萬。災梨殺青無虛日。嗣子皆才華名世，美丰神。座下戒子，鉢杖圍繞數十匝。薙度徒眾，環里市而處，如錯星。乃至紫綬金魚，乘高車肥馬，往來山林間，絡繹不絕而已。故下手時，便從世諦流布中著眼，便向門庭施設處安排。而佛祖真命脈，遂為此等人埋沒殆盡。五霸



者，三王之罪人。諒哉！（下略）

壽者福之本也。福者慧之基也。念念思警策者，慧之萌，而福與壽之源也。故曰：

「常想病時則塵心漸滅，常想死時則道念自生。」

夫病死正現前時，有何我相可恃？五欲可貪？有何名可戀？古董之可攜去？不恃我相，我見伏矣；不貪五欲，煩惱降矣；不戀虛名，體面可放下矣！知古董之不可攜去，則不越分以求之；縱先有者亦可捨之以作福矣！苟能離我我所見執煩惱，則視緇素靈蠢無一非未來佛，既所見無非未來佛，則凡可以供養恭敬未來佛者無弗為也；凡可以損惱忤觸未來佛者無弗止也。如此而福不增，壽不永，某舌當墮落。儻不能一切時念

未來佛，則不能一切時積集福慧。福慧不積，雖僥倖活至百年，亦終與草木同腐而已。

（上略）勿貪世間文字詩詞，而礙正法；勿逐慳貪嫉妒我慢鄙覆習氣，而自毀傷。（下略）

（上略）內不見有我，則我無能；外不見有人，則人無過。一味癡呆，深自慚愧，劣智慢心，痛自改革。（下略）

【答問】

問：西乾列祖，三學精通；此間地僻時遙，人罕聞見。唯唐宋來數輩宗匠，蹤跡彰著，然當其水邊林下，則以三條篾、一把鋤，爲清淨自活。逮其匡徒領眾，則以一日不作、一日不食，爲真實芳規。至於揚化接人，則以一棒一喝，爲



拈提向上，俱與律學不相應。好心出家之流，由行腳入山，至登座披衣，所做做者，無非此等；今還許從上諸祖是真比丘否？若非，何紹祖位？若是，何不遵律？又今紹祖位者例輕律學，從上諸祖亦輕視否？又今紹祖位者不遵戒而為人授戒，從上諸祖亦為人授戒否？

答：祖有三類。一者嚴淨毘尼、弘範三界。如遠公智者左谿永嘉荆溪大梅永明高峰中峰楚石等是也。古今如此知識，亦甚眾多，所應景仰倣倣。二者丁茲末世，勢不獲已，遵佛遺命捨微細戒。住靜則刀耕火種；領眾則墾土開田。然非時食等諸戒仍自遵行，故晚用藥石不用粥飯，德山托鉢亦因視影。而此等知識便不肯為人授戒。所以唐宋以來，有禪講律寺，初出家多學律，律有得則以律名家，無得則習

講參禪；但捨微細戒，不捨重戒及性戒也。復有逕投禪教者，此即乘急戒緩；然亦護根本五戒，斷無毀重之理。而決不敢自稱比丘、輕視律學；但愧未能，以為慚德。至出世接人；或重登戒品，性遮皆淨，如六祖等；或單提向上，獨接一機，如壽昌等。人問壽昌，佛制比丘不得掘地損傷草木，今何耕種芸獲？答云：「我輩祇悟佛心，堪傳祖意，指示當機，令識心性耳。正法格之，僅稱剃髮居士，何敢當比丘名？」問：「設有如法比丘，師何以視之？」答：「當敬如佛，待以師禮；非不為也，實未能也。」又紫柏大师生平一粥一飯無雜食，脅不著席四十餘年，猶以未能持微細戒，終不敢為人授沙彌及比丘法。必不得已，則授五戒法耳！嗟乎！從上諸祖敬視律學如此，



豈敢輕之，若輕律者定屬邪見，非宗匠也。（下略）

【普說】


（上略）吾今為諸昆仲徹底說破，若真為生死持戒，持戒亦必悟道，真為生死聽經，聽經亦必悟道，真為生死參禪，參禪亦必悟道，真為生死營福，營福亦必悟道。專修一法亦悟道，互相助成亦悟道，以因地真正故也。若想做律師，受戒；想做法師，聽經；想做宗師，參禪；想有權勢，營福。則受戒、聽經、參禪、營福，必皆墮三惡趣。故：

智者大師云：「為利名發菩提心，是三塗因。毫釐有差，

天地懸隔；錯認定盤星，醍醐成毒藥。」

今受戒、聽經、參禪、營福之士，口中亦說真為生死，心中未知生死大苦；火燒眉毛，且圖眼下，殊不知無始劫來，頭出頭沒，枉受多少辛酸？即今幸得人身，幸成僧相，亦經過多少艱苦？然猶未肯猛省發心，此與燕雀處堂何異？且如今夜臘月三十，古人以喻大命盡時，何等迫切！今人且歡呼茶飲，曾不思百歲光陰尚存幾許？豈不痛哉！（下略）

（上略）諸仁者，出生死事，大不容易。某二十四歲出家，真為生死大事，真不著一毫意見，真不用一點氣魄，真不為一些名利。只因藏身不密，為一、二道友所逼，功用未純流布太早。遂致三十年來，大為虛名所誤。直至於今，髮白面皺，生死大事尚未了當，言之可羞，思之可痛。所以平生誓不敢稱證稱祖，犯大妄語，誓不敢攝受徒眾，登壇傳戒。邇來並



誓不應叢林請，開大法席，蓋誠不肯自欺自誤故也。

今玄邃吳居士，普為緇素，特請開示超生脫死法門。某自實未曾超生脫死，如何可開示人？然既同在生死海中，幸於出生死法頗知真正路頭，故不妨與諸仁者平實商量最初一步。果欲超生脫死，第一不得意見卜度，第二不得氣魄承當，第三不得雜名利心。適閩之南，適燕之北，路頭一錯，愈趨愈遠。此實言言血淚，字字痛心。祇恐愁人莫向無愁說，說與無愁總不知耳。諸仁者，還知愁麼？

佛言：「得人身者，如爪上土；失人身者，如大地土。」

一口氣不來，便向驢胎馬腹胡鑽亂撞，動經千生百劫，得出頭來知是幾時？況末世邪師說法如恆河沙，一盲引眾盲，相

牽入火坑。故：

永明大師云：「無禪有淨土，萬修萬人去；

有禪無淨土，十人九蹉路。」

我憨翁大師又云：「今時若有禪無淨，奚止十人九錯？

敢保十一個錯在。」

此皆深慈大悲，真語實語。伏願諸仁者，莫墮狂野覆轍，直須痛念無常，信願念佛求生淨土。此身不向今生度，更向何生度此身？珍重！

【偶錄】

（上略）或曰：「古人取乘急戒緩何居？」答曰：「緩之



云，非無也；且豪傑之士，與其急乘緩戒墮惡道而方昇，何如乘戒俱急，常近佛而無退！又因戒生定，因定發慧，急戒即急乘之階梯。若藉經教為名利本，托話頭為優免牌，戒不唯緩而且廢，乘雖名急而實緩，甚非古人料揀之心也。」

予居徑山，始受一食法。有禪者曰：「定共戒道共戒是務，茲在所緩矣。」予不屑答也。嗚呼？儻侗瞞盱，病通斯世，解文識義，能復幾人？若在所緩，應云定奪戒道奪戒，共之一字云何通？

因地不真果招紆曲，何謂也？方受戒，志為律師矣；方聽經，志為法師矣；方參禪，志為宗師矣。不為律師法師宗師，無所用其受戒聽教參禪也。猶應院不為覲施，無用經懺。俗儒不為作宦，無用舉業；娼優隸卒不為利，無用眩色俳演、承迎

趨走也。雖然，以世法圖利，事雖卑無大過也。讀書規富貴，得罪宣尼矣。佛法博虛名，玷污正教矣。

予寓龍居。有老僧看寶積經云：「若先看此經，和尚做不成。」予曰：「若不看此經，和尚做不成。」謂不成和尚法故，謂無所取於為和尚故。噫！可為知者道，難與俗人言也。一花拈於三藏既說之後，達摩來自佛法盛行之時。龍畫就，一點睛則飛去也。今龍影尚無，睛何處點？

予遊歷諸山，備覽人情物態，顛倒最多，猝難悉舉。且如飲食衣服，塵勞也，惟恐不勤。持誦禮拜，勝業也，惟恐不惰。三聚淨戒，出世正因也，深厭煩瑣。百年活計，生死根本也，常虞缺略。為佛法，慢幢高起。求貨利，體面頓忘。乃至同一語也，謂出某經論則棄如怨敵，謂出某語錄則愛如珍寶。



世緣中事，與道無妨。律檢教門，有違向上。嘻！吾不知其所趣矣。

利關不破，得失驚之。名關不破，毀譽動之。既為得失毀譽所轉，猶以禪道佛法嗚呼？

不見己短，愚也；見而護，愚之愚也。不見人長，惡也；見而掩，惡之惡也。

或問予：「汝何願？」「願生西方。」「更何願？」「願入地獄。」曰：「是何心哉？」曰：「西方則上事諸佛；地獄則下度眾生。佛從彌陀始，願王勝故。生從地獄始，悲心切故。」

語云：「真人前，說不得假。」今也，假人前，說不得真。悲夫！

古人自牧愈卑，品愈高；今人自視愈高，品愈卑。古人自

處愈小，道愈大；今人自視愈大，道愈小。古人自考愈歉，德愈完；今人自恃愈完，德愈歉。是謂不揣其本，而齊其末。

小人以己之過為人之過，每怨天而尤人。君子以人之過為己之過，每反躬而責己。夫不謂人過，謂己過，有四觀焉。眼見惡色耳聞惡聲等，皆自業所感，非關他事故。惡境紛紛，皆唯識所現，虛幻不實故。眾生煩惱無量，應度應斷，已分事故。眾生修惡即是性惡，眾生性惡即己性惡故。

法性本常住，云何分正像。正像之分，全在人耳。嗚呼！時丁末季，去聖時遙。為利者，十之九；為名者，十之一，為己生死發二乘心者百千中一；為大地眾生發無上心者，萬萬中一。此止就禪和料簡耳，應院及俗人又不必言矣，佛法將安恃耶？



法門有七壞相、六興相。

何謂七壞相？

- 一、懼命夭，知命孤，以家貧故，令出家。
 - 二、避難無聊，激氣求安樂故，自出家。
 - 三、求清高故，自出家。
 - 四、以好名故受戒。
 - 五、好名故聽經。
 - 六、藏拙故參禪。
 - 七、好名故參禪。
- 七種雖高低不等，優劣判然，同為因地不真，壞法門一也。

何謂六興相？

一、為生死故出家。

二、為大菩提故出家。

三、為修行基本故受戒。

四、為修行門路故聽經。

五、為了生死故參禪。

六、為得種智故參禪。

六種雖大小不等，偏圓有殊，同為因地真正，能興正法一也。噫！凡吾同類，尚自考之；儻因地真，幸善自保持，俾終正而不入於邪；或因地未真，則痛自改悔，速反真而無溺於偽；庶幾自救，亦救法門耳！



【書】

五夏以前，專精戒律。專精者，豈徒著衣持鉢而已。律中第一要務，在常一其心，念無錯亂，謂依四念處行道也。四念處慧，佛法總關。無念處慧，著袈裟如木頭幡，禮拜如碓上下，六度萬行皆同外道苦行無與真修。若依念處行道。則持戒功德現能獲四沙門果，乃至圓十地剋獲無難。第二要務，在洞明二百五十戒開遮持犯之致，否則二六時，既掛比丘名，當結無量罪，言之駭聞，思之喪膽！（下略）

圓教從名字初心，便用佛知佛見修行。豪傑丈夫具一切無明煩惱，偏向冰凌劍鋒上行。非冰凌劍鋒，不能鑄無明煩惱成菩提般若故也。天降大任，必先苦勞拂亂，令動心忍性。頑鐵

不煉不成鋼，美玉不治不精瑩，松柏不歷歲寒不挺秀，孤臣孽子不厲熏不達。豈有粥飯習氣，煖軟形態，可坐進此道者？夫小小境緣便成事障，因平日無分毫契心恰意處耳。果達妙理，則現前極惡逆事，第一玄妙，為第一明師良友。若捨此等境界，何法可修、可悟、可頓耶？兄平日學問，大率向語言文字上著眼，不向義理上體會，躬行處較勘；轉得此關棧子，方是大乘淨土因也。

豪傑立身，決以破我、法二執為準的。我執不破，定不能作千古至人。法執不破，定不能弘如來正法。才魄橫一世者，須開千古眼界，成千古學識，方不負己靈。否則僅同春草之榮，終非松柏之幹。

法門不衰於無外護，衰於無內守。主持法門，先盤星立



正，然後隨時隨力與隆幻事，皆屬普賢行門。稍涉世間名利心，佛法止成世法，深可悲也！

（以下二書皆囑寄徹因比丘者）吾望公甚高，勿自卑。甚遠，勿自近。甚廣，勿自狹。甚大，勿自小。甚尊，勿自褻。甚重，勿自輕。甚穩，勿自浮。甚密，勿自疏。甚微，勿自陋。甚妙，勿自麤。聖賢自期謂之高。無數塵劫謂之遠。遍周刹海謂之廣。超權越小謂之大。不染名利謂之尊。不輕去就謂之重。始終一致謂之穩。精察力行謂之密。窮理盡性謂之微。開佛知見謂之妙。嗚呼！律門衰敗，大法並危。不具前之十德，鮮克砥其頽波。勉之哉！第一須依念處行道。隨文入觀，觸事會心。心觀為主，看教為助。第二須專求已過，勿責人非。第三須作出生死學問，莫作趨時學問。第四須和光同塵，

幸勿矜異。

欲看教典，且完玄籤。次十不二門詳解，次律藏五百卷並大乘律五十卷，次止觀輔行，次阿含經等諸小乘經，然後及餘經論。或急於修證，唯律藏不可不閱，餘皆隨意。萬勿妄想出頭。惟真操實履，了當生死。不得為人改法名。剃度師與受戒教授傳法師，皆有父子之誼。改法名，是蔑剃度師也。傷理背情，無道之甚。古來知識不聞有法派之說，奈何末世以此為親。吾聞先受戒者在前坐，後受戒者在後坐。不聞先取名者為師兄，後取名者為師弟。既以法派為重，必以戒法為輕。叔伯弟姪，儼然與俗無異。可羞可恥，所宜痛戒。不得曲媚權貴，須如達大師家風。若不能，寧死不出頭。不得多收徒眾，多畜沙彌，多受依止。教訓不周，必有壞法之咎。切忌餽送白衣等



事。切忌無恥喪心，到人家念經拜懺，漸成應赴。即檀越到山門作福，須示以佛法尊重，莫如近時叢林套子。亡比丘物，依律分與現前僧，切不可學估唱陋習。其餘諸事，不能枚舉。總以律為指歸，則無過矣。不聽吾言，非吾弟也。

真實比丘，寥寥無幾。不知何日五比丘如法同住，一展吾外護初心。興言至此，肝腸寸裂。所有不絕如線一脈，僅寄足下。萬萬珍重愛護，養德充學以克荷之。勿為最後斷佛種人，使我抱憾千秋，至囑，至囑。遠隔三千里，未審作何用心，苟不能念念與妙觀相應，則失聞熏琢磨之益多矣！

（上略）病是吾輩良藥，消盡塵寰妄想，覷破此身虛幻，深明苦、空、無常、無我觀門，皆賴有病境耳！願寬心耐意，安忍無厭，作隨緣消舊業想，轉重令輕受想，代眾生受苦想，

正不以不如人為愧也！

身病易治，心病難遣。古云：「克己，須從性偏難克處，克將去。」慈雲大師亦云：「行人各有無始惡習，速求捨離。當自觀察，何習偏重，訶棄調停取令平復。勿使行法唐喪其功。」夫惡習豈惟殺盜淫妄而已，二六時中，四威儀內，苟可動人念頭者，最能折福損壽也。

顛沛患難，是鍛鍊佛祖英靈漢一大爐鞴。能受鍛鍊，便如松柏歷歲寒而逾堅；不受，則如夏草春花，甫遇風霜，頽靡無似矣。夫松柏花草，稟質不同，不可強也。現前一念靈明心性，豈有定質？只貴當念自立，將身心世界一眼覷破，平日晏安粥飯習氣一力放下，便向刀山劍樹遊戲出沒，有何艱險？縱身心世界情見放不下，而身心世界未嘗不是空華；縱晏安粥飯



習氣除不得，而業運臨頭，何處保得晏安粥飯如意？千經萬論皆磨礪習氣之具；習氣不除，學問何益？不能親明師良友，受惡辣鉗錘，徒覓幾部好佛法，靜靜閑坐，燒香啜茗而披閱之，此措大學問，尚不可為世間聖賢，況佛祖哉？佛祖可如此悠悠而得，善財、常啼，真千古極拙人矣，何為華嚴般若之榜樣也？（上略）大丈夫出家，不拌二、三生理埋頭徹底，輒希十年、二十年後弘教揚宗，修天爵以邀人爵，終必亡而已矣！

【論】

非時食戒十大益論

客問杜多子曰：吾聞殺盜婬妄名為性罪，飲酒昏迷失智慧

種，食眾生肉斷大慈悲。是以如來制戒，七眾同遵，固無惑焉。至於常食養身，有何過咎。而非時食戒，如此嚴耶？願聞其旨。杜多子曰：吾正欲申齋法之要，以執行人，時哉！問也。夫齋法，是十方三世諸佛弟子通行大道，出生死法之要津也。愚夫逐逐口腹，甘為飲食之人，既畏此律檢，豈辨其利益？今原如來立制本意，盡善盡美，何能殫述？略而舉之，大益有十：

一、斷生死緣：

經云：「一切眾生皆因婬欲而正性命。」

又云：「三界眾生皆依飲食而得存活，所謂段食觸食思食識食。」



由此觀之，婬欲固生死正因，飲食乃生死第一增上緣也，均為五欲所攝。特資此毒身，借之修道，不能全斷。然設得時食，尚作曠野食子肉想，何容恣意於非時耶？

二、表中道義：

台宗云：「午前進食，表方便道，猶似有法可得。

過中不食，表除中道外，更無所需。」

此之理觀，全托事境。儻粗戒尚不自持，非同俗人夜猶飲食放縱之不及，即同外道日啖一麻一麥之太過。行不適中，妙理何由契會？

三、調身少病：

脾主信，數數食，最能傷脾。故玄門以戒晚食為養生善術，豈名忍餓。

四、道業尊崇：

趙州云：「二時粥飯是雜用心處。二時已雜，況三、四耶？」

儒曰：「飲食之人，則人賤之。」

今恪守齋法，專精辦道，道業自隆。

五、堅固戒品：

晚食助火助氣，增長婬心。今寂爾清淨，戒體堅牢。

六、堪能修定：



斷其雜食亂想，身心輕利，取定不難。

七、出生智慧：

晚餐助昏蓋，今清淨惺寂，不障觀慧。又於四種食，如法作厭離想，即能斷三界惑。

八、離鬼畜業：

畜生午後食，鬼夜食。不持齋法，鬼畜無異，牽入其類。持此齋法。遠離二趣生緣。

九、不惱檀信：

謂長乞食者，設午後更復持鉢，則終日但見沙門往還，必令施主生惱。今午後惟晏坐修道，能令僧俗皆安。

十、不擾行人：

今時叢林晚餐，廚人惟事炊爨，終身碌碌，不異傭工。齋法若明，則無此煩擾，共修道業。

是以諸佛出世，必立此制。乃至在家居士，猶令於月六齋日，受八關齋法，以種永出因緣。況沙彌比丘，可無慚無愧，非時受食耶？設有病苦因緣，佛自立非時漿七日藥以濟之，斷無以晚食為藥石之理也。願高明者，深信而力行之。

【緣起】

退戒緣起並囑語



某生於萬曆己亥。二十四歲壬戌，為天啟二年，痛念生死事大，父未葬，母不養，決志出家。時紫柏尊者已寂園中，雲棲老人亦遷安養，憨山大師遠遊曹溪，力不能往。其餘知識非予所好，乃作務雲棲，坐禪雙徑，訪友天台。念念趨向宗乘，教律咸在所緩。後因幾番逼拶，每至工夫將得力時，必被障緣侵擾。因思佛滅度後，以戒為師。然竟不知受戒事何為如法？何為不如法？但以雲棲有學戒科。遂從天台躡冰冒雪，來趨五雲，苦到懇古德法師為阿闍黎，向蓮池和尚像前頂受四分戒本，此二十五歲癸亥臘月初八也。甲子臘月二十一，重到雲棲，受菩薩戒。乙丑春，就古吳，閱律藏四旬餘，錄出事義要略一本。此後仍一心參究宗乘矣。戊辰春，雪航檝公留住龍居，再閱律藏一遍，始成集要四本。己巳春，送惺谷壽公至博

山薙髮，無異禪師見而喜之，即欲付梓。予曰：「未可也。」是冬，同歸一籌師結制龍居，更閱律一遍，訂成。庚午正月初一，燃臂香，刺舌血，致書惺谷。三月盡，惺谷同如是昉公，從金陵回，至龍居，請季賢師為和尚，新伊法主為羯磨闍梨，覺源法主為教授闍梨，受比丘戒。予三閱律，始知受戒如法不如法事。彼學戒法固必無此理，但見聞諸律堂亦並無一處如法者。是夏，為二、三友盡力講究。不意或尋枝逐葉不知綱要。或東扯西拽，絕不留心。或頗欲留心，身嬰重恙，聽不及半。其餘緣眾，無足責者。予大失所望。解夏後，結壇持大悲咒。惺谷以此書呈金臺法主，隨付梓人。次年，予入壇持大悲咒十萬，加被之。然已發念退休。越二年癸酉，安居。作八關供佛像前，燃香十炷，一夏持咒加被，自恣日，更燃頂香六炷。拈

得菩薩沙彌鬪，深自慶快，願永作外護，奉事如法比丘。孰意未運決難挽回，正法決難久住。予又病苦日增，死將不久。追思出家初志分毫未酬，數年苦心亦付唐喪。撫躬自責，哀哉痛心。恐混迹故鄉，虛生浪死。故決志行遁，畢此殘生。以手書集要全帙，謹付徹因海比丘（比丘名果海。為新伊法主指示令來學者）。仍涕泣而囑曰：「嗚呼！佛法下衰，斯時為盛。毗尼一脈不絕如絲，教道禪宗尤為混亂。予數年苦心，未能砥狂瀾於萬一，僅成此書，並問辯音義各二卷。一文一字罔敢師心，一義一法咸符聖教。蓋不惟律部精髓，亦禪教網維。由斯戶可升堂入室，執斯鏡可照膽辨邪。惜公根性稍鈍，僅知開遮持犯條目，未達三學一貫源委。且福相未純，智慧力薄，缺於辯才，短於學問，豈能即弘傳斯道？但念公之從予遊者五夏，

有三事足取焉。幾番惡辣鉗錘，難堪難忍，絕無退心，縱未頓改舊觀，番番略有進益。有人如法受具，未肯細心行持，惟公聽集要後，輕重諸戒，悉思躬行。予癸酉甲戌匍匐苦患，公獨盡心竭力，相濟於顛沛中，毫無二心。充此三善之致，何必不可荷擔正法？但須解行雙修，戒乘俱急。虛其心、實其志、擴其眼界、牢其腳跟，盡在我修持，任外緣自集。萬勿輕舉妄動，貽羞法門。儻煩惱未伏，慧眼未開，辯才未具，學問未充，縱有福運，須力卻之。況作意邀求耶？苦身形、堅願力。依念處而精進行道，以律藏為法身父母。臨深履薄，守茲一脈。儻遇英哲，當殷重付囑之。無其人，寧供塔廟尊像中，慎莫授非人也。天定能勝人，人定亦能勝天。予運無數苦思，發無數弘願，用無數心力，不能使五比丘如法同住，此天定也。



然此思此願此心此力豈遂唐捐？公若善繼吾志，敬守之，以俟後賢，庶幾亦可稱人定乎？始終不忘吾囑，千里同風。否則塵劫永隔矣。勉哉！」

【序】

重治毗尼事義集要自序

予生於萬曆己亥五月初三日亥時，至壬戌五月七日薙髮出家，是為二十四歲。次臘，受具戒於雲棲和尚像前。又次年，受菩薩戒於和尚塔前。二十七歲春，閱律一遍，錄出事義要略，僅百餘紙。次夏，第二閱律，錄成四冊。次冬，第三閱律，成六冊，計十八卷。三十二歲夏；為壽昉楫三友（惺谷壽

師如是昉師雪航楫師），細講一遍。添初後二集，共八冊。次年，金臺法主梓於臯亭之佛日寺。是冬，在靈峰，僅講七卷。次夏，方續完。聽者十餘人，惟徹因比丘能力行之。次夏，在金庭西小湖寺，徹講一遍。聽者九人，能留心者惟徹因自觀及緣幻大德耳。次冬，在吳門幻住菴，又講一遍。聽者五、六人，惟自觀僧聚二比丘能力行之。三十八歲入九華。四十歲入閩。四十四歲至茗城。從此十三、四年無有問者，徹因自觀僧聚三人又皆物故。毗尼之學，真不啻滯貨矣。五十一歲冬，從金陵歸臥靈峰。次夏，乃有發心學律者十餘人，迫予重講。因念向所輯，雖諸長並採，猶未一一折衷。又問辯音義二書，至今未梓，不若會入集要而重治之。兼削一二繁蕪，以歸簡切。庶鈍根者，亦不致望洋也。

【題跋】

刻《十二頭陀經》跋

頭陀以抖擻塵勞為義，具十二法。迦葉尊者終身奉行。世尊謂正法住世，全賴此人。迨茲末運，妄以鬚髮當之。尚不知比丘戒為何事，矧頭陀法耶？予雖根劣，僅持一二，然一番展讀，輒一番愧感。例諸賢達，想亦當爾。重錄梓行。伏願見聞隨喜者，發增上心，少多奉持。庶重興正法，不日可望耳。

十大礙行跋（十大礙行出寶王三昧念佛直指）

佛祖聖賢，未有不以逆境為大爐鞴者。佛四聖諦，苦諦居初。又稱八苦為八師。苟稍存喜順惡逆之情，終與夏草同腐而

已。安能如松柏之亭亭霜雪間哉？美玉不琢不成器，頑金不煅不致精，鐘不擊不鳴，刀不磨不利。豈有天生彌勒，自然釋迦。欲為聖賢佛祖，必受惡罵如飲甘露，遇橫逆如獲至寶。方名素患難行乎患難，方可於穢土植淨土因，方如蓮出淤泥超登不退。儻無事則駕言念佛求生淨土，一遇不如意輒悔慍咨嗟。吾恐三昧不成，生西未保。須於此十大礙行一一自驗，果然病時難時乃至被抑時，唯增念佛心，明苦空觀，不尤不怨。庶蓮萼日滋，稱三昧寶王矣。

【傳】

誦帚師往生傳



師諱宏思，一字如是。晉江溜灣人。族姓陳。髫年入郡之開元寺，禮湛然精舍肖滿全公為師。薙髮後，喜詩文，不理錢穀。氣節昂然，緇素咸敬憚之。年二十七，忽發出世心。盟月臺心默師及惺谷何居士，為生死交。朝夕參究大事，忘形破格，風雨寒暑弗替也。時溫陵佛法久荒，聞熏乏種。師獨與惺谷，鼓舞數人，謁博山無異禪師。受具戒，苦參無字，脅不著席者三年。異師愍其勤，恐致病，說調琴喻勸之。稍稍晏息，終不解衣。師志遠大，縱有省悟，不自足，亦不輕舉似人。同輩視師若木訥，師固是非了了，洞如秦鏡矣。離博山，遊浙直，習教觀於幽谿。鑒末世暗證之失，遵永明角虎之訓，遂神棲安養，期以萬善同歸。迨惺谷薙草，師以受惺谷教益最深，欲推為先臘。且博山受戒不如法，遂捨前所授，禮季賢師為和

尚，覺源、新伊二法師為阿闍梨，次惺谷進比丘戒，兼進菩薩大戒。結夏，聽予律要。次年，惺谷師西逝。師以全公年邁，歸侍創八關社，接引居士。從此溫陵緇素，始知有如來正戒。師自視欲然，惟明師良友是念。越五載，復逃江外，踏冰雪尋予九子峰頂。未幾，全公變，厥孫泣挽回泉，乃訂予續至紫雲作掩關計。逮予踐約，未及一載。歸遂示疾。召予助其念佛，命侍者除髮浴身，浴畢端坐，舉手而逝。正念分明，神清氣定。越二時，頂顙尚煖。托質蓮蕊無疑也。師生平自奉甚約，破衫補履，數十年如一日。予嘗笑謂之曰：「舜視棄天下猶棄敝屣，師棄敝屣猶天下也。」師愀然曰：「某非故作慳態，愧薄德不堪消受檀信耳。」甘淡薄，忍疲勞，精勤禪誦、夜寐夙興，雖劇病臨危，亦不懈廢。誠有古人風。至於親信師友，受



惡辣鉗錘，如飲甘露。於古人中，亦不多得。假以數年，近可匹休異巖，遠可追蹤斷崖。惜乎！生年僅五十，戒臘甫十夏。自度固已有餘，利他功未及半。痛哉！與士夫往復，必隨其病渴，飲以苦口。師侍者錄成帙，予戲題為老婆禪。便有偈頌詩詠數十首，未示疾前一月，忽焚之。嘗取律中一偈，銘諸座右。偈曰：「名譽及利養，愚人所愛樂。能損害善法，如劍斬人頭。」（此偈出根本說一切有部律）師未嘗不與鄉紳賢達交，而心固覷破如此也。猶憶其咏菊絕句云：「籬菊數莖隨上下，無心整理任他黃。後先不與時花競，自吐霜中一段香。」此可窺其概矣。師自謂神根稍鈍，晚稱誦帚道人。志在掩關專修淨業，又號藏六比丘。其道昉一諱，則異師所命也。按紫雲開士傳，已得八十人，今當續稱第八十一云。

【祭文】

祭顓愚大師爪髮衣鉢塔文

嗚呼！人不難相愛，難於相知。翁真知我者哉！世縱有一、二愛且知者，而志操相攜，旭雖不敢擬翁泰山之德，幸三事略無違焉。尚質朴，詘虛文，不肯苟合時宜。注經論，讚戒律，不肯懸羊頭而賣狗脂。甘淡薄，受枯寂，不肯受叢席桎梏而掣其羈縻。嗚呼！以法門耆宿如翁，而旭過蒙知愛，又志操相合如此，其能已於懷也？翁所證深淺，非某能擬，而生平最傾心處，請略紀之。當今知識，罕不以名相牽、利相餌、聲勢權位相依倚，如翁古道自愛者有幾？當今知識，罕不以掠虛伎倆，籠罩淺識，令生驚詫。如翁平實穩當者有幾？當今知識，



罕不侈服飾、據華堂、恣情適意。如翁破衫草履、茅茨土階者有幾？當今知識，罕不精選侍從，前列後隨。如翁躬自作役，不圖安享者有幾？當今知識，罕不同流合污，自謂善權方便慈悲順俗。如翁不肯苟殉諸方，甘受擔板之誚者有幾？故凡聞翁之風者，頑夫廉而不濫，懦夫立而不傾。伯夷之隘，所以為聖之清也。豈似枉尋直尺詭遇一朝者，身雖存，名已先淪也哉？旭每悲如來正法，一壞於道聽塗說入耳出口之夫，再壞於色厲內荏羊質虎皮之徒。其父報讎，其子必且行劫。尤而效之，何所不逞。翁之爪髮衣鉢幸存，則翁之道風未滅。必有聞而興起者，庶共砥狂瀾於末葉乎！

【銘】

德林座右銘

以冰霜之操自勵，則品日清高。以穹窿之量容人，則德日廣大。以切蹉之誼取友，則學問日精。以慎重之行利生，則道風日遠。故曰：「忠以行己，恕以及物。」又曰：「修其天爵，而人爵從之。」

淨社銘

持戒為本。淨土為歸。觀心為要。善友為依。

四無量心銘（一慈二悲三喜四捨）

視人之善，猶己之善。視己之善，猶人之善。念念同觀，

亙古無間。法界偕遊四德城，方滿最初宏誓願。

視人之惡，猶己之惡。視己之惡，猶人之惡。猛省力除，無令愧怍。法界眾生三毒除，彼我同歸無上覺。

視人之樂，猶己之樂。視己之樂，猶人之樂。所欲與共，嫉妒永卻。法界同欣法喜充，不向偏空尋略約。

善惡性具，善惡性空。何喜何怒，如空御風。默持機感，妙應無窮。大圓鏡智照不疲，豈似權乘作意通。

妙嚴室銘（爲庸庵作）

忘羸斯妙，不飾斯嚴。慎爾幽獨，自牧以謙。干將匪利，口斧誠銛。君子自返，慧日普瞻。

【詩偈】

丙寅季夏先慈捐世賦四念處以寫哀

一觀身不淨、二觀受是苦

三觀心無常、四觀法無我

恩愛迷情，四大緣生妄有身。膿血交相潤，臭穢常無盡。
饒你會莊矜，畫囊盛糞。一旦神離，不復堪親近。切莫把未爛
骷髏認作真。

妄想驅馳，吸攬前塵作所依。業感原無意，苦樂隨因異。
苦果實堪悲，酸辛難比。世樂雖榮，享盡愁還至。切莫把五欲
塵勞枉自迷。

迷卻真常，緣氣紛紜集一腔。離彼前塵相，分別成何狀。



饒你會思量，終歸罔象。過未無踪，現在原長往。切莫把流注心機作主張。

藏性周圓，循業隨心法法全。和合因緣舛，戲論須排遣。外道枉糾纏，盲無慧眼。妙有真空，覓我同陽燄。切莫把十界依他作本然。

庚寅自恣二偈（有序）

臥北天目，萬慮灰冷。有同志數人，以毘尼相叩。夫毘尼久為腐貨，仍過而問焉，不啻冷灰豆爆矣！安居竟，重拈自恣芳規，悲欣交集，慨然有作。

秉志慵隨俗，期心企昔賢。擬將凡地覺，直補涅槃天。半世孤燈歎，多生緩戒愆。幸逢鍼芥合，感泣淚如泉。

正法衰如許，誰將一線傳。不明念處慧，徒誦木叉篇。十字哀先逝，諸英喜復聯。四弘久有誓，莫替馬鳴肩。



印光法師嘉言集

——依印光法師文鈔嘉言錄節錄——

晚晴老人敬錄時年六十又三

◎念佛時必須字字句句從心而發，從口而出，從耳而入。一句如是，百千萬句亦如是。能如是則妄念無由而起，心佛自可相契矣。都攝六根，淨念相繼，依此而行，決無歧誤。

◎念佛不能純一，必須制心不令外馳，久久自會純一。

◎學道之人，凡遇種種不如意事，只可向道上會，逆來順受。則縱遇危險等事，已過便如作夢，何得常存在心。汝既欲修行，當知一切境緣，悉由宿業所感。又須知至誠念佛，則可轉業。吾人不做傷天損德事，怕什麼東西。今為汝計，宜放

開懷抱，一切不可以計慮，不可以擔憂。只怕躬行有玷，不怕禍患鬼神。

◎學道之人，道念重一分，則凡情輕一分，此必然之勢也。然未斷惑之人，常須努力，若一放縱，舊病定至復發。

◎古德云：不怕念起，只怕覺遲。貪瞋癡一起，立即覺了，則立即消滅矣。若以貪瞋癡為自家正主，其家財寶必致消散矣。

◎被境所轉，係操持力淺。則喜怒動于中，好惡形于面矣。操持者，即涵養之謂也。若正念重，則餘一切皆輕矣。是以真修行人，於塵勞中煉磨。煩惱習氣，必使漸漸消滅，方為實在工夫。斷不可起煩躁心，怨天尤人。

◎乩壇所說，多屬靈鬼，依託當人之智識而作。其所開示改過遷善、小輪迴、小因果等，皆與世道人心大有裨益。至於說



天說佛法，直是胡說。吾等為佛弟子，不可排斥此法，以其有阻人遷善之過。亦不可附贊此法，以其所說佛法，皆屬臆撰，恐致壞亂佛法，貽誤眾生之愆。

◎若有暗地裏口傳心受之妙訣，是邪魔外道，非佛法。

◎人生世間，幻住數十年。從有知識以來，日夜營謀，忙忙碌碌。無非為養身家，做體面，遺子孫而已。推其病根，只因執著有我，不肯放下。而于自己主人公本來面目，則反置之不問。任其隨業流轉，永劫沈淪，可不哀哉。

◎願我同人，咸生正信，凡不宜貪戀之境現前，則知此吾之鑊湯鑪炭也。則斷不至如飛蛾赴火，自取燒身矣。凡分所應為之事，則知此吾之出苦慈航也。則斷不致當仁固讓，見義不為矣。

◎世間富貴奚啻陽燄空華，直同囹圄毒海耳。

◎瞋者，見境而心起忿憎之謂。富貴之人，每多瞋恚。以諸凡如意，需使有人。稍一違忤，即生瞋怒。唯取自己快意，不顧他人傷心。又瞋心一起，於人無益，於己有損。輕亦心意煩躁，重則肝目受傷。須令心中常有一團太和元氣，則疾病消滅，福壽增崇矣。

◎吾人一念心性，與佛無二。只因迷背本心，堅執我見。則一切諸緣，皆為對待。倘知我心原是佛心，佛心空無所有。猶如虛空，森羅萬象，無不包括。亦如大海，百川眾流，無不納受。如天普蓋，似地均擎，不以蓋擎自為其德。我若因小拂逆，便生瞋恚。豈非自小其量，自喪其德。雖具佛心理體，其起心動念，全屬凡情用事。

◎佛法大無不包，細無不舉。譬如一雨普潤，卉木同榮。修身齊家治國親民之道，無不具足。古今來文章蓋一時，功業喧宇宙者。則其精神志節，皆由學佛以培之。

◎佛教大無不包，細無不舉。不但身心性命之道，發揮罄盡無餘。即小而世諦中孝弟忠信、禮義廉恥等，亦毫善弗遺。唯於煉丹運氣等，絕無一字言及，而且深以為戒。

◎今幸得此大丈夫身，又聞最難聞之淨土法門。敢將有限光陰，為聲色貨利消耗殆盡，令其仍舊虛生浪死，仍復沈淪六道，求出無期者乎。直須將一個死字，掛到額顱上。

◎但恨人之不誠心念誦，致不得其全益耳。

◎若境遇不嘉者，當作退一步想。試思世之勝我者固多，而不如我者，亦復不少。但得不飢不寒，何羨大富大貴。樂天知

命，隨遇而安，如是則尚能轉煩惱成菩提，豈不能轉憂苦作安樂耶。

◎須知具縛凡夫，若無貧窮疾病等苦，將日奔馳於聲色名利之場，而莫之能已。誰肯於得意烜赫之時，回首想乎。

◎人一生事事皆可偽為，唯臨死之時，不可偽為。況其無愛戀之情，有悅豫之色，安坐而逝，若非淨業成熟，曷克臻此。

◎禮誦持念，種種修持，皆當以誠敬為主。經中所說功德，縱不能圓得，而其所得，亦已難思難議。若無誠敬，則與唱戲相同。其苦樂悲歡，皆屬假裝，不由中出。縱有功德，亦不過人天癡福而已。而此癡福，必倚之以造惡業，其將來之苦，何有了期。

◎光陰迅速，時序更遷。剎那剎那，一念不住。此殆造物出廣



長舌，普為爾我一切眾生，說人命無常，榮華不久。急尋歸路，免受沈淪之無上妙法耳。

◎有血性漢子，豈肯作走肉行尸，死與草木同腐，高推聖境，自處凡愚，遇大警策而不奮發，聞聖賢佛祖之道，而不肯行，是天負人耶？抑人負天耶？

是心是佛
是心作佛



南無阿彌陀佛

回向偈

願以此功德
莊嚴佛淨土
上報四重恩
下濟三途苦
若有見聞者
悉發菩提心
盡此一報身
同生極樂國

格言別錄

印贈者——香光淨宗學會

電話：(02) 85110955

傳真：(02) 85110953

地址：台北縣三重市中興北街179號1樓

淨空法師
影音網址

淨空法師專集網站 <http://www.amtb.org.tw>

淨空法師專集簡體網站 <http://www.amtb.cn>

淨空法師英文網站 <http://www.chinkung.org>

排版承印——和裕出版社

電話：(06) 2454023—7

中華民國九十六年六月恭印壹仟本結緣
佛曆二五五一年

【歡迎翻印·功德無量·免費結緣·敬請愛護珍惜】

真誠
清淨
平等
正覺
慈悲



看破
放下
自在
隨緣
念佛

本會法寶·免費結緣·絕無託人募款義賣·敬請明察·愛護珍惜

Printed in Taiwan (This book is not to be sold.)
FOR FREE DISTRIBUTION